

06/09/2003

Dr M tidak jemu dengan misi damai

SAJAK Damainya Negeriku yang dideklamasikan oleh Datuk Seri Dr Mahathir Mohamad dalam Pesta Puisi Patriotik Ke-4 di Taman Putra Perdana, Putrajaya pada malam Jumaat lalu, secara jelas mengajak rakyat Malaysia agar sentiasa mencintai negara ini.

Dengan mengangkat tema kedamaian kehidupan manusia sejagat, Perdana Menteri mengajak rakyat menginsafi betapa beruntungnya mereka menikmati kehidupan yang penuh kedamaian di negara ini.

Pengucapan puisi yang penuh dengan nada memujuk itu mengemukakan perbandingan keharmonian kehidupan di negara ini, berbanding negara lain yang dilanda peperangan, kekejaman dan kemusnahan.

Dr Mahathir yang mengambil masa kira-kira empat minit untuk mendeklamasikan puisi berkenaan, kelihatan sesekali sebak, terutama ketika mengucapkan bait `kita tidak lagi akan menjadi bangsa dihina'.

Tidak ketinggalan Dr Mahathir sempat berseloroh kedamaian yang dicarinya masih belum ditemui meskipun hingga ke malam dan mengajak rakyat Malaysia mempertingkatkan usaha memajukan negara kerana kejayaan akan sentiasa menunggu mereka yang rajin berusaha.